

DOMENIE III «VIE PAL AN»

Jutoris pe Liturgjie

Domenie, ai 21 di Zenâr dal 2018

Fate la sielte dai dissepui (domenie passade), la liturgjie de messe di vuê nus presente la spirtualitât di Gjesù e il ritornel che le compagneve: Il timp si è colmât e il ream di Diu al è rivât. Poben, convertîtsi e crodêt tal vanzeli.

Ce intindevino i Ebreus dai temps di Gjesù par ream di Diu? Lôr di secui in ca a jerin restât scotâts e deludûts de monarchie (1000 av. - 587 p.d.C.) e a vevin capît che dome Diu, aleât fedêl di un popul tibiât, al podeve meti in dret la situazion. Di consequence a spietavin un ream di Diu, e su chel trôno al varès vût di sentâsi un dissident dal re David.

Chest moment, al proclamave Gjesù, al jere rivât. Però no nus dîs ancjemò su ce strade e in ce maniere; al zonte dome dôs condizions: convertîtsi - crodet; e alore il ream di Diu al sarà finalmentri la felicitât in chest mont.

Il Friûl a son secui che al spiete un ream di Diu dulà cjapâ flât; al semeave chest il moment, ma ancje te nestre tiere a son bruts segnâi: e cale la canae e al cres il malcontent. O stin ancje nô "persone - popul - glesie" cirint e spietant, forsit cence savê, un ream di Diu.

Che e vali ancje par nô la esortazion di Gjesù: Il ream di Diu al è rivât. Poben, convertîtsi e crodêt tal vanzeli ?

Antifone di jentrade

Sal 95,1.6

Cjantait al Signôr une cjante gnove,
cjantait al Signôr di dute la tiere;
maiestât e sflandôr a cjaminin denant di lui,
potence e bielege a jemplin la sô cjase.

Colete

Diu onipotent e eterni,
indrece la nestre vite seont il to bonvolê,
par che, tal non dal to Fi tant cjâr,
o podin fâ ogni sorte di ben.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Gn 3,1-5.10

La int di Ninive si mendarin de lôr brute condote.

Se cualchidun no lu cognòs, al sta pôc a lei il librut di Gjone (cuatri cjapituluts); al sta tant di plui, evidentementri, a meditâdint sore.

Culî, in preparazion al vanzeli e ven presentade la conversion de int di Ninive odeade dai Ebreus pai grancj delits tai lôr confronts. L'avertiment al è: se si son convertîts lôr a la peraule di un profete, tant plui o varin di convertîsi nô a la peraule di Gjesù.

Dal libri dal profete Gjone

La peraule dal Signôr e plombà parsore di Gjone pe seconde volte. I disè: «Jeve sù e va a Ninive, la grande, a contâi il mes che jo ti doi».

Gjone si metè in viaç par lâ a Ninive seont la peraule dal Signôr. Ninive e jere une citât grande denant di Diu, lungje trê dîs di viaç. Gjone, dopo di vê cjaminât dentri de citât par une di interie, al berlà: «Ancjemò corante dîs e Ninive e sarà fiscade!».

La int di Ninive i croderin a Diu e a ordenarin di zunâ, vistûts di sac dal plui grant al plui piçul. Diu al viodè lis lôr voris, ven a stâi che si jerin mendâts de lôr brute condote. Alore Diu si pinti dal mâl che ur veve professât e no lu fasè gran.

Peraule di Diu.

SALM RESPONSORIÂL

dal Salm 24

Come che spes al sucêt te liturgjie, anje chest salm al è stât scurtât. Di fat tal originâl (Salteri n. 25) al è plui lunc, e anje tant plui siôr. Culî l'anime dal pecjadôr si vierç cun dute confidence al Signôr parcè che e cognòs il boncûr di Diu e e à esperience de sô misericordie. E il piu israelit pentît al domande cun insistence: Insegnimi, Signôr, i tiei trois, indrecimi su la tô strade.

R. Fasimi cognossi, Signôr, lis tôs stradis.

Se cjantât: Il cjant dai salms responsoriâi, p. 140.

Insegnimi, Signôr, i tiei trois.

Fasimi lâ indenant te tô fedeltât,
parcè che tu tu sês il Diu che mi salve
e dute la mari dal di jo ti spieti. **R.**

Visiti, Signôr, dal to boncûr
de tô misericordie che di simpri e dure.
Visiti di me seont il to boncûr,
Signôr, te tô misericordie. **R.**

Bon e just al è il Signôr;
par chel al indreçarà i pecjadôrs pe sô strade.
Al fasarà cjaminâ i puars te sô justizie
e ur insegnarà la sô strade. **R.**

SECONDE LETURE

1 Cor 7,29-31

E passe la compare di chest mont.

La seconde leture e va par cont so, ma, gjavantle de curnîs, nus va ben metile dentry tes riflessions di vuê. Di fat dapruf des grandis novitâts dal ream di Diu dut al devente relatif come te vite, e dut al à di sedi cun relativitât tornât a valutâ tirant fûr dal propri tesaur robis gnovis e antighis (Mt 13, 52).

De prime letare di san Pauli apuestul ai Corints

Us dîs chest, fradis: il timp si è scurtât. Di cumò indenant, chei ch'a an la femine ch'a sedin come se no le vessin; chei ch'a vain, come se no vaissin; chei ch'a son contents come se no fossin contents; chei ch'a comprin come se no comprassin; chei ch'a doprin chest mont come se no lu doprassin: parcè che e passe la compare di chest mont!
Peraule di Diu.

CJANT AL VANZELI

Cf. Ef 1,17-18

R. Aleluia, aleluia.

Il Pari dal nestri Signôr Gjesù Crist
che nus dedi un spirt di sapience,
par che o podìn capî
cuale ch'e je la sperance de nestre clamade.

R. Aleluia.

VANZELI

Mc 1,14-20

Convertîtsi e crodêt tal vanzeli.

Convertîtsi, *tal vanzeli di vuê nol ûl dî diventait plui bogns ma al ûl dî “cambiait completamentri strade”, acetait di deliberâsi ancjemò une volte di vualtris stes par cirî cun dut il cûr il ream di Diu.*

Crodêt tal vanzeli di Diu: *i antîcs a clamavin vanzeli il mes che al puartave al popul une grande biele notizie.*

Tal nestri câs il vanzeli nol è un librut stampât ma la persone stesse di Gjesù: al è lui la buine notizie cu la sô vite; o vês di crodi in lui.

Ancje in zornade di vuê si domandasi ce che e je la felicitât, se esist, e cemut cjatâle. Se nevrosi, cunfusion, malstâ e violence a son in aument al vul dî che la contentece de vite e sta calant. Nol è sbalgjât alore molâ lis nestris sigurecis e acetâ l'invît di Gjesù: convertîtsi e crodêt tal vanzeli.

Al è ce che ur è sucedût a Simon e Andree, a Jacum di Zebedeo e Zuan so fradi. E lôr, vude une esperience di felicitât tal Signôr, bandonadis dal moment lis rêts, i lerin daûrji.

Dal vanzeli seont Marc

Dopo che Zuan al fo metût in preson, Gjesù al vignì in Galilee, predicjant il vanzeli di Diu. Al diseve: «Il timp si è colmât e il ream di Diu al è rivât. Poben, convertîtsi e crodêt tal vanzeli».

Passant ad ôr dal mâr di Galilee, al viodè Simon e Andree, fradi di Simon, ch'a jerin daûr a butâ lis rêts tal mâr. Di fat a jerin pescjadôrs. Gjesù ur disè: «Vignît daûr di me e jo us fasarai diventâ pescjadôrs di oms». E lôr, bandonadis dal moment lis rêts, i lerin daûrji. Lant un toc plui indenant, al viodè Jacum di Zebedeo e Zuan so fradi, ch'a jerin ancje lôr su la barcje a comedâ lis rêts, e ju clamà dal moment. E lôr, bandonât lôr pari Zebedeo su la barcje insieme cui lavorents, i lerin daûrji.

Peraule dal Signôr.

Su lis ufiertis

Acete di bon voli, Signôr, i nestris regâi,
par ch'o sedin santificâts
e nus zovin pe nestre salvece.
Par Crist nestri Signôr.

Antifone a la comunion

cf. Sal 33,6

Cjalait il Signôr e us lusaran i vôi,
e lis vuestris musis no varan di diventâ rosis.

O ben: Zn 8,12

Jo o soi la lûs dal mont, al dîs il Signôr.
Chel ch'al ven daûr di me, nol cjamine tal scûr,
ma al varà la lûs de vite.

Daspò de comunion

Diu onipotent, ti prein
di dânus la gracie di une gnove vite,
e di tignîsi simpri in bon dal to regâl.
Par Crist nestri Signôr.

* * *

Riflession di pre Antoni Beline: **Vignît daûr di me**

Al è il cantin de vocazion, de clamade. Crist che al passe e che al clame altre int. No par che al vebi dibisugne ma parcè che al ûl che ancje i oms i dedin une man tal pescjâ altris oms. Ancje se la salvece e reste un at di Diu spotic e mistereôs, come che al è mistereôs lui e mistereôs il cûr dal om.

Par solit, fevelant di vocazion...

Vanzeli par un popul, an B, p. 100.

* * *

Cjants

*Libri **Hosanna**, sot il titul **Eucaristie**: messe, benedizion eucaristiche, rîts e cjants; dal n.7 al n.62 comprendût.*

* * *

***Diu e l'umanitât a son doi inamorâts
che sbalgjade l'ore a rivin ancje prime
ma un di une bande e chê altre tun altri lûc.***

***E a spietin, spietin.
Lui al è in pîts, tal so puest, e di simpri al sta spietant;
jê e je distrate e no à pazience.
Puare mai jê se si stufe e si slontane.***

Simone Weil

* * *

* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris*

dal popul furlan, Ed. Glesie Furlane, 2012.

* *Il cjant dai salms responsoriâi, Ed. Glesie Furlane, 2012.*

* *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La nuova base.*

* *Par domandâ chescj libris scrivêt a info@glesiefurlane.org*